




ԹԵՄԱԿԱՆ ԿՅԱՆՔ

ԼՈՒՐԵՐ ՀԱՅԱՍՏԱՆՅԱՅՑ ԵԿԵՂԵՑՈՒ ՀՅՈՒՄԻՍԱՅԻՆ ԱՄԵՐԻԿԱՅԻ ԱՐԵՎՄՏՅԱՆ ԹԵՄԻՑ

Հայաստանյայց եկեղեցու Հյուսիսային Ամերիկայի արևմտյան թեմը հոգևոր և մշակութային խանդավառությամբ և հետևողականորեն շարունակում է իր նվիրյալ և գիտակից ծառայությունը՝ թեմակալ առաջնորդ Ս. Վաչե արքեպիսկոպոս Հովսեփյանի գլխավորությամբ:

Թեմից ներս գեղեցիկ ավանդություն են դարձել «Տարեկան առանձնացումները», որոնց մասնակցում են հոգևոր հայրեր, թեմական և ծխական խորհուրդների անդամներ, երիտասարդական կազմակերպության վարչական կազմի անդամներ, պատգամավորներ և այլ պատասխանատու անձինք:

Տիկնանց Միությունը նույնպես կազմակերպում է դաստիարակչական ծրագրով առանձնացում և հայ սրբուհիներին նվիրված հոգեվոր արարողություններ: Այս տարվա հոգևոր արարողությունը նվիրված է եղել Սրբուհի Խոսրովիդուխտ իշխանուհուն:

Տիկնանց Միության այս տարվա առանձնացումը տեղի է ունեցել Սանտա Բարբարայում՝ նախագահությամբ առաջնորդ սրբազան հոր: Խորհրդածության ընդհանուր թեման է եղել «Սուրբ մկրտություն»: Ձեկուցումներ են տրվել հետևյալ թեմաների շուրջ.

1. «Հավատք, հույս, սեր և մկրտություն» (վեկուցող՝ Ս. Վաչե արքեպիսկոպոս):

2. «Ս. Մկրտություն» (վեկուցող՝ Ս. Գևորգ քին. Առաքելյան):

3. «Վերստին ծնունդ» (վեկուցող՝ Ս. Վարդան քին. Գասպարյան):

4. «Դրոշմ—Սուրբ Հոգու խորհուրդը» (վեկուցող՝ Ս. Շահե ավագ քին. Ալթունյան):

Ծխական խորհուրդների առանձնացման ընթացքում գործադրվել է հետևյալ հայտագիրը. Ս. Արտակ ծ. վրդ. Խաչատուրյանը վեկուցել է Ս. Գրիգոր Նարեկացու կյանքի և գործունեության մասին:

Օկլենդի Ս. Վարդան եկեղեցուց Ջեյք Մարկոսյանի վեկուցման թեման է եղել՝ «Ընկերային կյանքի պայմանների ազդեցությունները ամերիկահայ համայնքների վրա»:

Ս. Վազգեն քին. Մովսիսյանը վեկուցել է «Քավություն—ինչպե՞ս պետք է փրկվել» թեմայի շուրջ:

Ս. Արիս եպս. Շիրվանյանը վեկուցել է «Սուրբ մկրտության խորհուրդը» թեմայի շուրջ:

Վերջին վեկուցողն է եղել Ռիչարդ սրկ. Սարաֆյանը, որի վեկուցման թեման է եղել «Քրիստոս մեր ներկա կյանքի մեջ»:

ԱՐԵՎՄՏՅԱՆ ԹԵՄԻ 56-ՐԴ
ՊԱՏԳԱՄԱՎՈՐԱԿԱՆ ԺՈՂՈՎԸ

Հյուսիսային Ամերիկայի հայոց արևմտյան թեմի պատգամավորական 56-րդ տարեկան ժողովը տեղի է ունեցել սույն թվականի ապրիլի 28—30 օրերին՝ Հովիվոյի հայոց Ս.

Հովհաննու Կարապետ Մայր եկեղեցում՝ նախագահությամբ թեմակալ առաջնորդ Տ. Վաչե արքեպիսկոպոսի:

Տիկնանց Միության համագումարին մասնակցել են տասնվեց մասնաճյուղերի պատգամավորներ և ներկայացրել իրենց տարեկան տեղեկագրերը:

Փակման խոսքից և օրհնության աղոթքից առաջ առաջնորդ սրբապանը գնահատության և օրհնության վկայագրեր է հանձնել Կենտրոնական Վարչության նախորդ ատենապետուհիներին և իրենց պաշտոնները ավարտած տիկիներին:

Ներկայացված բոլոր տեղեկագրերը գնահատանքով և երախտագիտական պգացումներով են ընդունվել պատգամավորների կողմից:

Պատգամավորները ամենայն լրջությամբ և համերաշխ ոգով քննարկել են ժողովի օրակարգում դրված հարցերը և ընդունել համապատասխան որոշումներ:

Որոշվել է՝

ա. Շարունակել Մայր եկեղեցու համալիրի

շինության հարմար մի հողամաս գտնելու առաջարկը:

բ. Հաստատել ամառային մի նոր ճամբարավայրի գնման առաջարկը:

գ. Բոլոր ծխերի կալվածքները արձանագրել տալ առաջնորդարանի անվան:

դ. Դարձյալ ճշտվել են արևմտյան թեմի աշխարհագրական սահմանները և այլն:

Ժողովի ընթացքում տեղի են ունեցել ընտրություններ: Ընտրվել են՝

ա. Մնայուն հիմնադրամի անդամներ.

բ. Թեմական ժողովի պաշտոնյաներ.

գ. Թեմական խորհուրդ.

դ. Հաշվեքննիչ հանձնախումբ:

Ժողովը որոշում է ընդունել արևմտյան թեմի առաջիկա թեմական 57-րդ պատգամավորական ժողովը գումարել Սան Ֆրանցիսկոյի հայոց Սուրբ Հովհաննես եկեղեցում:

Ժողովը փակվել է առաջնորդ սրբապանի օրհնության խոսքով և աղոթքով:

Նույն օրը, երեկոյան, տեղի է ունեցել պաշտոնական ճաշկերույթ, որի ընթացքում գործադրության է դրվել գեղարվեստական մի ճոխ հայտագիր:

